

ODLUKA o uvođenju posebnih mjera kontrole cijena snabdijevanja električnom energijom za 2024. godinu

Na osnovu člana 19. stav (2) Zakona o Vladi Federacije Bosne i Hercegovine ("Službene novine Federacije BiH", br. 1/94, 8/95, 58/02, 19/03, 2/06 i 8/06), člana 4. i člana 137. stav (2) Zakona o električnoj energiji Federacije Bosne i Hercegovine ("Službene novine Federacije BiH", broj 60/23), a u vezi Odluke Vlade Federacije Bosne i Hercegovine o proglašenju stanja ugrožene sigurnosti snabdijevanja električnom energijom za 2024. godinu ("Službene novine Federacije BiH", broj 94/23), Vlada Federacije Bosne i Hercegovine, na 22. sjednici, održanoj 12.12.2023. godine, donosi

ODLUKU

O UVOĐENJU POSEBNIH MJERA KONTROLE CIJENA SNABDIJEVANJA ELEKTRIČNOM ENERGIJOM ZA 2024. GODINU

I.

Vlada Federacije Bosne i Hercegovine tokom 2024. godine ograničava povećanje cijena snabdijevanja električnom energijom za krajnje kupce do 20% maksimalno u odnosu na prethodnu godinu, pri čemu se isto odnosi na ugovore koji se zaključuju na period do 31.12.2024. godine.

II.

Cijena snabdijevanja za 2024. godinu za postojećeg krajnjeg kupca ne može biti veća od cijene tržišnog snabdijevanja koja bi se utvrdila za 2021. godinu za odgovarajući naponski nivo, uvećane za po 20% za 2022., 2023. i 2024. godinu, a u skladu sa Odlukom o ograničavanju povećanja cijena snabdijevanja električnom energijom za 2022. godinu ("Službene novine Federacije BiH", broj 3/22), Odlukom o ograničavanju povećanja cijena snabdijevanja električnom energijom za 2023. godinu ("Službene novine Federacije BiH", broj 87/22) i tačkom I. ove odluke.

III.

Svi snabdjevači u Federaciji Bosne i Hercegovine, prilikom dostave ponude za zaključenje ugovora svojim postojećim kupcima, dužni su se pridržavati ograničenja iz tač. I. i II. ove odluke.

IV.

Elektroenergetski subjekti, u skladu sa članom 4. stav (3) Zakona o električnoj energiji Federacije Bosne i Hercegovine ("Službene novine Federacije BiH", broj 60/23), dužni su prvenstveno obezbijediti dovoljne količine električne energije koja je potrebna za poslovanje i razvoj privrednih i drugih subjekata, zadovoljavajući pri tome kriterije ekonomičnosti isporuke.

V.

Radi obezbjeđenja sigurnosti snabdijevanja električnom energijom, elektroprivredna preduzeća u većinskom vlasništvu Vlade Federacije Bosne i Hercegovine dužna su se pridržavati ograničenja iz tačke II. ove odluke prilikom dostave ponude za zaključenje Ugovora krajnjim kupcima na svom distributivnom području.

VI.

Odredbe ove odluke ne sprječavaju krajnjeg kupca da na tržištu slobodno izabere snabdjevača po tržišnim uslovima.

VII.

Ova odluka se ne primjenjuje na rezervne i javne snabdjevače.

VIII.

Svi snabdjevači su dužni kvartalno izvještavati Vladu Federacije Bosne i Hercegovine o efektima primjene ove odluke.

IX.

Na osnovu izvještaja iz tačke VIII., te drugih informacija kojima raspolaže, Vlada Federacije Bosne i Hercegovine može korigovati ograničenje iz tač. I. i II. ove odluke.

X.

Ova odluka stupa na snagu danom donošenja i primjenjuje se za vrijeme trajanja stanja ugrožene sigurnosti snabdijevanja električnom energijom za 2024. godinu, u skladu sa Odlukom Vlade Federacije Bosne i Hercegovine ("Službene novine Federacije BiH", broj 94/23).

XI.

Ova odluka će se objaviti u "Službenim novinama Federacije BiH" i sredstvima javnog informisanja.

V. broj 1786/2023
12. decembra 2023. godine
Sarajevo

Premijer
Nermin Nikšić, s. r.